



**IMPORTANT NOTE** 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

**Name of School** : YUEN LONG LONG PING ESTATE WAI CHOW SCHOOL  
**學校名稱** : 元朗朗屏邨惠州學校  
**Name of Play 劇名** : 愚公不移山  
**Script writer 劇作者** : 劉詠賢老師

**Synopsis 故事大綱：**

堅毅的愚公雖然人身已故但精神不死。故事開場，愚公鏗而不捨地移山，在挖掘的過程中，遇見了三位偉大發明家：愛因斯坦、愛迪生和魯班。在發明家們的旁敲側擊下，愚公好像對移山的計劃有了新的想法。

在平衡時空下的愚子、愚妻和愚孫也為了堅持愚公的信念而產生了分歧，愚孫發揮了小朋友的好奇心和探究精神，向移山的理念作出挑戰。



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

**地點：**創新天堂科技委員會辦公室 / 地上阻路的山

**(音樂出，孫妹妹與地上山景出鏡)**

孫妹妹：各位觀眾，我係愚孫，即係愚公個孫，相信你地都聽過愚公移山嘅故事，個故事原來仲有另一個版本架，話說愚公有一日瀝住個鋤頭喺度猛咁掘呀掘……呢！哩個就係我爺爺，愚公呀，佢好有毅力架，所以未能夠留名於後世囉……

**(音樂過門：孫妹妹退場，轉天堂景 / 愚公與天堂景前加黑咭出場，持鋤頭出鏡)**

愚公：我掘！我掘！嗨！點解去天堂條路咁長嘅，掘極都掘唔到！  
到底天堂喺邊度呢！（堅定地）我唔信掘唔倒去天堂嘅路！我掘我掘……

**(魯班、愛因斯坦、愛迪生+天堂景出鏡)**

愛因斯坦：Oh, no！你哋睇下！都掘左咁多年啦！睇黎我地要幫下佢先得啦。

魯班：真係俾佢激死，係咁掘都唔知佢掘咩，家陣上天堂呀，唔係叫佢移山移石咁嘛。

愛迪生：(肯定地)Well，我一早都話要用兩文三語，指示得清清楚楚啦！明明背脊有對翼喺度都唔曉用，搞左咁多年都係喺度摸摸下！

魯班：(附和着)係啦！係啦！至少都要裝啲照明工具啊，即使有人誤入途，搵錯地方，摸錯路，都可以摸到黎總站咁嘛！係哩，二老愛！唔該借你發明果枝嘅路上光黎，等我去救救同胞啦！

愛迪生：Oh, no problem! 隨便囉去用啦。

魯班：唔該晒。

**(音樂過門：魯班背加黑咭出鏡，用手電筒照愚公)**

愚公：(朝着源望去) 咦，有光嘅，梗係到埗啦！

(欣喜若狂地) 兄台！兄台！見到你真係好囉，總算見到個人啦！未請教兄台高姓大名呢？

魯班：好話啦，我係魯班，人稱魯班師父就係我啦。

愚公：原來兄台就係魯班師傅，真係失覺晒。

魯班：唔好咁拘謹啦，大家都係天堂嘅左鄰右里，我係嚟幫你帶路架。

愚公：(失望地)吓！乜原來仲未到天堂架！



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

魯班： 放心啦！有我帶路，好快到埗。你放低個鋤頭啦，跟我黎。

**(音樂過門：魯班、愚公+黑咭退場 / 天堂景+愛迪生、愛因斯坦背面出鏡)**

魯班： 你哋過嚟呀，我帶左我個同胞嚟呀！

**(愛迪生、愛因斯坦面向面鏡頭)**

魯班： 愚公，我同你介紹，呢位大老愛，愛因斯坦，呢位二老愛，愛迪生！

愚公： (拱手為禮)兩位兄台有禮！小弟愚公啊！

愛迪生： **Nice to meet you!** 其實我地好耐之前已經喺超時空影像機裡面見到你架啦。睇住你好隻白老鼠咁成日氹氹轉，如果唔喺大佬愛佢睇唔過眼要幫你，怕且你都仲有排掘啊！

愚公： (向愛因斯坦拱手以謝)咁真係多謝大佬愛你拔刀相助，如果唔係，小弟都唔知仲要掘幾耐至掘到嚟天堂囉。

愛因斯坦： **You're welcome!** 小意思，唔駛咁客氣啦！我都唔忍心見你咁咁埋啲時間。係呢，話時話，乜你唔知你可以唔駛行，唔駛掘，都可以嚟到天堂嘅咩？

愚公： 唔駛行，唔駛掘，都可以嚟到天堂？即係點呀？

愛迪生： 即係可以飛囉！

愚公： 阿二老愛兄台，你真風趣。我雖然老但係我未懂得晒，我又唔係雀仔，又點會識飛呢？

魯班： 唉，乜你唔知，你個背脊後面有對翼嘅咩？

愚公： 有對翼？(懷疑地，伸手摸背脊)依！係喎幾時生咗對翼出嚟架？

魯班： 係你被批准上天堂果一刻，對翼就跟住長左出嚟架啦！

愚公： 喺啦，怪唔得知我成日覺得個背脊好似有啲野係度郁下郁下咁啦。承教承教(再拱手為禮)唉...真係枉我一世自命有毅力意志堅，連自己有對翼都唔識用，結果都係要靠人幫先至到天堂，唉.....(慚愧地搖頭)

愛因斯坦： (安慰愚公)唔緊要啦，雖然你行左咁耐都有乜老咩，仲好精神！相信你加入左我地呢個創新天堂科技委員會一定會有所作為嘅！



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

愚公： 咁又係呀！雖然我啲隔離鄰舍都話我傻，叫我做愚公，不過，我做野都算好有耐性，絕對唔會半途而廢，我諗呢啲就係我既成功之處嘞！

魯班： 成功？！你點成功啊？你嘅工程都未完成就上咗嚟啦。

愚公： (指示著超時空影像機，並自鳴得意地解釋)

魯班兄，你睇，我嘅老婆同個仔，仲有我個孫女，佢地都好努力咁繼續做緊我嘅偉大工程啊！

愛迪生： 咦！佢地做咩起勢咁掘嚟地呀？嘩，將一箕一箕嘅泥倒埋一邊做咩呢？

愚公： (神氣地) 佢地要移山囉！

三偉人： (驚訝地齊聲道) 移山？

愛迪生： 咁樣移山？

愚公： (堅定地) 係呀！只要有毅力，咁就大山可以挪開，小山可以遷移...

**(音樂過門：三偉人、愚公退場，天堂景轉山景 / 愚妻、子、孫與山景出鏡)**

孫妹妹： (埋怨地) 阿爹，點解個山好似掘極都掘唔完咁嘅？

愚子： 孫妹妹，俾啲耐性啦，我好似你咁大果陣，就跟你阿爺日日黎掘座山架啦。

孫妹妹： 咁即係要掘到幾時啫？

愚妻： 孫妹妹，你乖啦，你猛咁問你阿爹都無用架，你阿爺臨終前話過，無論點都要掘走座山為止。

愚子： 孫妹妹，你問咁多野，係咪想偷懶呢？

孫妹妹： (辯解地) 梗係唔係啦，阿爹，你估我係隔離屋個隻豬咩？！

愚妻： 嗨，你兩父女唔好再拗咁多啦。嚟、嚟、嚟，不如我地唱返亞爺用嚟激勵我地努力移山嘅果首歌，好唔好？(回味地) 記得我地每次唱完首歌都好似充滿力量咁架。嚟！預備，一、二、三.....

子妻唱： (邊唱邊舞) 大山可以挪開，小山可以遷移.....

孫妹妹： 嫻嫻，唔係哩，宜家我地要出城之嘛，有條直路過到去咪得囉，將成個山剷走晒，一來啱時間、啱人力，二來個山好地地，剷走晒佢會唔會可惜左啲啊？

愚妻： 聽落又好似有啲道理啲。